

INTENSIFIED IEC CAMPAIGN

Chief Minister Pu Lalduhoma'n Mizoram chu HIV AIDS darh zel tur venna kawnga inhrihlhriatna tha, zawm tha silo ang a a lan mek thu a sawi.

Wawiina I&PR Auditorium Aizawla HIV/AIDS darh zel tur venna beihpui thlakna, Intensified IEC campaign khuh hawna inkhawmah Chief Minister chuan he thu hi sawiin, HIV AIDS darh zel tur venna kawngah hmalakna awmze nei zawm hlawh tak neih a pawimawh tak meuh meuh thu a sawi a, he beihpui thlakna in a huam tur Mizoram chhunga khua leh veng tin YMA leh Kohhran tin te pawhin an phak ang tawka hma la tute lo tawiawm tura a ngen thu a sawi bawk.

Health and Family Welfare Minister Pi Lalrinpuii pawhin thusawiin HIV hrik chuan mi nawlpui a luhchilh tawh a ti a, mi nun pel he leh hum sual daite chauh vei tura dah bik a hun tawh loh thu sawiin HIV natna veite chuan mi dangte anga an damchhung hun hahdam tak leh hlim taka an hman ve theih nan hnualsuat mai lova mi pangngai anga en an mamawh tih a sawi bawk.

He inkhawmah hian Mizoram State Aids Control Society Project Director Dr. Jane R Ralte chuan HIV AIDS chungchanga Mizoram dinhmun report pe in kum 1990 atanga 2025 thleng Mizoramah HIV positive mi 32,994 hmuhchhuah an nih tawh thu sawiin kum kalta 2024 April thla atanga kumin 2025 June thla inkarah HIV positive mipa 1602 leh hmeichhia 869 hmuhchhuah an nih thu tarlangin hmeichhe zinga 140 te chu nau pai lai mek an nih thu a sawi bawk.



HAR GHAR TIRANGA

Har Ghar Tiranga pualin vawiin khan Mizoram hmun hrang hrangah Hnam Puanzar ngaihhlut inzirtirna puala hun hman a ni. Sawrkar Laipui, Ministry of Culture thuchhuak angin kumin Independence Day vawi 79na puala Har Ghar Tiranga – Hnam puanzar ngaihhlut inzirtirna hun hi vawiin khan Aizawl Vanapa Hall ah buatsaih a ni a, Vanapa Hall kawtah hnam puanzar zawrh chhuah a ni.

Siaha ah chuan vawiin khan Hnam Puanzar Kawng zawh hi Vaihpi Playground atangin Bazar Traffic Point thleng zirlai naupangte leh mipuiin kawng an zawh a, mi 700 chuang kal chhuakin hun kharna programme tawi Bazar Traffic Point a neihah District Bawrhsap Pu VL Hruaizela Kiangte kalkhawm mipuite chu India in zalenna a neih hlutzia hre thar turin a fuih a, Independence Day lo thleng tur chu hlim leh lawm taka hmang theuh turin duhsakna a hlan nghal bawk a ni.

Saitual District ah pawh tukin khan hnam puanzar chawimawina leh a hlutzia inzirtir tharna, Har Ghar Tiranga 2025 campaign pualin zirlai naupang ten kawng an zawh a. Naupangte hi CI kawng, Saitual leh Keifang kawng atang kawng zawh tanin, Keifang Centenary Complex-ah an intawkkhawm a ni. He hunah hian Pu J. Lalawmpuia, SDC chuan thu sawiin Har Ghar Tiranga campaign an hman chhan te a sawifiah a, Tiranga chu Tricolour tihna niin, India flag-a rawng chi thum a entir a, awmze thuk tak a nei bawk a ni tih a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve-ah Chanchinthar puan leh a ni ang.



MBSE TO CONDUCT CLASS 9 EXAM

Mizoram Board of School Education chuan kumin September leh October thla hian Pawl 9 zirlai tan Random Examination a buatsaih dawn. MBSE thuchhuah tarlan danin Pawl 9 exam tur hi September leh October thla ah neih tur a ni dawn a, exam ah hian Pawl 8-a zirlai hrang hrang chu Mutiple Choice in zawhna a rawn chhuak dawn a, zirlai te chuan OMR Sheet in zawhna an chhang dawn a, exam hun leh ni hi MBSE in hriattirna a pe chhuak leh dawn a ni.



DM&R MINISTER

Vawiin khan Disaster Management & Rehabilitation (DM&R) Minister Prof. Lalnilawma chuan National Disaster Management Authority (NDMA) hotute chu a pisa-ah kawmin khuarel thil chhiatna hrang hrang laka invent dan tur an sawiho.

He hunah hian Mizoram chu khuarel chhiatna thlen nasatna hmun a nih anga district tina khuarel chhiatna hrang hrang leimin, tuilian, lirnghing leh adangte thlen theihna enho a ni a. Mizoram chhunga khuarel chhiatna liantham lo thleng tawh hrang hrang chipchiar taka enho niin DM&R dept hotute leh NDMA hotute chuan khuarel chhiatna avanga harsatna thleng thei tihziaawm dan leh chhawmdawlina kawnga chak zawka thawhho dan tur hrang hrangte an sawiho a ni.



PMAY

Sawrkhar laipui chuan Pradhan Mantri Awas Yojana hnuaiah State leh Union Territory ah In sak na vaibelchhe 4.12 a pe chhuak tawh. He thu hi Parliament inkhawmah Rural Development Minister Chandra Sekhar Pemmasani an zawhna leh chhanna hunah sawiin PMAY hnuaiah cheng vaibelchhe 2 nuai 90 chu insak tanpuina atan senral anih thu a sawi a, Kum 10 kalta chhung in Prime Minister Narendra Modi sorkar chuan state leh UT hnenah sawrkhar laipui pual in cheng vaibelchhe sang 6 za 6 a pe tih a sawi bawk.



INDIA-SINGAPORE RELATIONS

India leh Singapore hotulu thutkhawm wawi 3na chu naktuk hian New Delhi ah neih a ni dawn a, he hunah hian India aiawhin Union Minister Dr S Jaishankar, Nirmala Sitharaman, Ashwini Vaishnaw leh Piyush Goyal te an tel dawn a ni.

Ministry of External Affairs chuan thuchhuah siamin, he meeting ah hian Singapore atangin Minister te an lokal dawn tih sawiin Singapore Deputy Prime Minister Gan Kim Yong leh Foreign Affairs Minister Josephine Teo te pawh an tel dawn a ni. He thuthkhawm hian India leh Singapore thawhdunna atana hmalakna thar tur leh ram 2 te inlaichinna thuk zawk siam dan tur kawng hrang hrang ngaihtuah a ni dawn a, India leh Singapore Minister’s thutkhawm hmasa ber hi September 2022 khan New Delhi ah neih a ni.

